

आकाशवाणी

खास-खास खबरां:-

- असम- केरलम ते पुदुचेरी दे विधानसभा चुना शांतिपूर्ण ढंगे सिर सम्पन्न- पुदुचेरी च नानूए इशारिया 8-7 फीसद मतदान दर्ज कीता गेआ।
- पच्छिम बंगाल च दुए गेड़ दे विधान सभा चुनाएं आस्ते नामांकन पत्रे दी जांच अज्ज होग।
- सरकार नै केन्द्रीय सशस्त पुलस बल सामान्य प्रशासन अधिनियम 2026 अधिसूचित करी दिता ऐ। राष्ट्रपति होरे इस बिल गी मंजूरी दिती।
- विदेश सचिव विक्रम मिसरी होरे वॉशिंगटन च अमरीका दे विदेशमंत्री मार्को रुबियो हुंदे कन्ने मलाटी कीती।
- ईजरायल नै पाकिस्तान दे रक्षा मंत्री दिएं टिप्पणिएं दी सख्त लफजे च निंदेआ कीती।
- ते IPL क्रिकेट च कल रातीं कोलकाता दे इडन गार्डन च खेडे गेदे मैच च लखनऊ सुपर Giants नै कोलकाता नाइट राडर्स गी 3 विकट कन्ने हराया।

<><><><><><>

Assembly Election Polling

असम- केरलम ते पुदुचेरी च विधानसभा चुनाएं ते 3 राज्ये च 4 विधानसभा चुनावी हलके दे उप-चुनाएं दा मतदान कल शांतिपूर्वक सम्पन्न होई गेआ। निर्वाचन आयोग मुजब असम च 85 इशारिया 3-8 फीसद ते पुदुचेरी च नानूए इशारिया 8-7 फीसद मतदान होआ- दौने राज्ये अपने विधानसभा चुनां इतिहास दा सब्बने थमां मता मतदान दर्ज कीता। केरलम च मतदान फीसद 78 इशारिया सिफर 3 फीसद रेआ। मुख चुनां अधिकारी ज्ञानेश कुमार होरे निर्वाचन आयुक्त डाक्टर एस.एस सिंधु ते डाक्टर विवेक जोशी हुंदे कन्ने लाइव वेबकास्टिंग राएं मतदान प्रक्रिया दी निगरानी कीती। इने क्षेत्रे च पैहली बारी सारे मतदान केन्द्रे पर वेबकास्टिंग दी बवस्था कीती गेदी ही।

इस बारी EVM बैलट पेपर पर मेदवारें दे रंगीन चित्र- मोबाईल जमा करने दी सुविधा- रिडिजाइन कीती गेदी मतदाता सूचना पर्चिएं ते हर इक मतदान केन्द्र पर बद्दोबद्द इक जहार 2 सौ मतदाताएं दी तय सीमा सनें मतदाता अनूकूल केई इंतजाम कीते गेदे हे।

<><><><><><>

WB Assembly Election

पच्छिम बंगाल च दुए गेड़ दे विधानसभा चुनाएं आस्तै नामांकन पत्रें दी जांच अज्ज होग। इस गेड़ च 142 सीटें आस्तै नामांकन भरने दी समें-सीमा कल मुक्की गई ही। मेदवारें दे नां वापस लैने दी खीरी तरीक 13 अप्रैल ऐ। भारतीय जनता पार्टी ते विपक्ष दे नेता शुभेन्द्र अधिकारी ते तृणमूल कांग्रेस दी प्रमुख ममता बैनर्जी दुए गेड़ दे चुनां लड़गंन। दुए गेड़ दा मतदान 29 अप्रैल गी होग। पैहले गेड़ लेई मतदान आस्तै नां वापस लैने दी समें-सीमा कल सम्पन्न होई गे।

<><><><><><>

Prez -CRPF Bill

सरकार नै केन्द्रीय सशस्त्र पुलस- सामान्य प्रशासन अधिनियम 2026 अधिसूचित करी दिता ऐ। राष्ट्रपति द्रौपदी मुरमू होरें इस विधेयक गी अपनी मंजूरी देई दिती ही। एह विधेयक राजपत्र च प्रकाशित होई चुके दा ऐ। नमें अधिनियम च 50 फीसद औहदे भारतीय पुलस सेना थमां महानिरीक्षक दे औहदे पर प्रतिनियुक्ति दे राएं भरे जाने ते घट्टो-घट्ट 67 फीसद औहदे अपर महानिदेशक दे ओहदे पर प्रतिनियुक्ति दे राएं भरे जाने दा प्रावधान ऐ। नमें कायम कन्नू दा मकसद केन्द्रीय पुलस बल- CRPF-BSF- CISF-ITBP ते SSB च ग्रुप -ए गी जनरल ड्यूटी अधिकारिएं ते होर कर्मिएं दी भर्ती ते सेवा शर्ते गी काबू करने आहली इक व्यापक ते इक नमीं प्रणाली कायम करना ऐ।

<><><><><><>

Jal Shakti

जल शक्ति मंत्रालय दी 21मीं केन्द्रीय निगरानी समीति दी बैठक दे दुए गेड़ च कल नदियें दे पुनरुद्धार ते प्रदूषण नियंत्रण पर राज्यें दी प्रगति दी समीक्षा कीती गई। जल शक्ति मंत्रालय नै दस्सेआ जे समीति नै प्रदूषित नदी क्षेत्रें आस्तै योजनाएं दी अमलावरी दी समीक्षा कीती जेदे च सीवरेज उपचार संयंत्र ते CETP दी प्रगति बी शामिल ऐ। समीति नै मौजूदा सीवेज उपचार कचरे दे प्रबंधन दे उपाएं ते हाड़ औने आहले इलाकें दे विनियमन कन्नै सरबन्धी मुद्दें दे कम्मकाज ते अनुपालन दी स्थिति दा जायजा लैता।

<><><><><><>

Power Min. -Bhutan King

ऊर्जा मंत्री मनोहर लाल होरें कल भूटान दे राजा जिग्मे खेसर नामगेल वांगचुक हुंदे कन्नै मलाटी कीती। मलाटी दौरान मनोहर लाल होरें भारत ते भूटान बश्कार टकोहदी बे-मिसाल ते सदिए परानी दोस्ती गी मज़बूत करने च भूटान दे राजा हुंदे लगातार मार्ग-दर्शन ते नेतृत्व आस्तै आभार व्यक्त कीता। मंत्री होर 4 दिन दी भूटान यात्रा पर न। केन्द्रीय मंत्री होरें आखेआ जे ऊर्जा सहयोग भारत-भूटान सरबन्धें दा प्रमुख थम्म ऐ।

<><><><><><>

EAM Mauritius

विदेशमंत्री डाक्टर एस. जयशंकर होरें आखेआ जे पिच्छले इक बरे च भारत ते मॉरीशस बश्कार सांझेदारी च महत्वपूर्ण प्रगति होई ऐ। पोर्ट लुई च मॉरीशस दे प्रधानमंत्री नवीन चन्द्र राम गुलाम हुंदे कन्नै बैठक मगरा डाक्टर जयशंकर होरें आखेआ जे चर्चा च समुन्द्री सहयोग- विकास सांझेदारी-सेहत- शिक्षा-क्षमता विकास ते जन सरबन्धें सनें केई क्षेत्र शामिल हे। उंनें मॉरीशस दी विकास प्राथमिकताएं दे मूजब भारत दा लगातार समर्थन दौहराया।

डाक्टर जयशंकर होर 9में हिंद महासागर सम्मेलन च हिस्सा लैने लेई मॉरीशस पुज्जे। विदेशमंत्री होरें आखेआ जे पिच्छले बरे मार्च च प्रधानमंत्री नरेन्द्र मोदी हुंदी मॉरीशस दी यात्रा दौरान दौनें मुख्यें सरबंधे गी महत्वपूर्ण रणनीतिक सांझेदारी तगर लेई जाने पर सहमति जाहिर कीती ही।

<><><><><><>

Misri- Rubio Meet

विदेश सचिव विक्रम मिसरी होरें वॉशिंगटन च अमरीका दे विदेशमंत्री मार्को रुबियो हुंदे कन्नै मलाटी कीती। व्हाईट हाउस च होई दी इस बैठक दौरान प्रमुख क्षेत्रें च दपक्खी सहयोग मज़बूत करने पर ध्यान केन्द्रित कीता गेआ। दौनें पक्खें बपार- महत्वपूर्ण खनिजें- रक्षा सहयोग ते क्वाड ढांचे पर जोर दिंदे होई भारत-अमरीका सांझेदारी दी समीक्षा कीती।

<><><><><><>

Foreign Secy. US Visit

विदेश सचिव विक्रम मिसरी जेडे त्रे दिन दी अमरीका यात्रा पर न- होरें अमरीका दे रणनीतिक समुदाय दे प्रमुख नेताएं कन्नै भारत-अमरीका दपक्खी सरबंधें दी मौजूदा स्थिति ते भविष्य दी दिशा पर चर्चा कीती। उ'नें भू-राजनीतिक घटनाक्रम ते वैश्विक ऊर्जा- खाद्य ते आर्थिक सुधार पर बी विचार-विमर्श कीता। उन्दे दौरें करी भारत-अमरीका दे दपक्खी सरबंधें दे सारे पैहलुएं दी समीक्षा करने ते प्रमुख क्षेत्रें च चला'रदे सहयोग गी अगगे बढ़ाने दा मौका थहोआ ऐ।

<><><><><><>

Isreal -Pak

इज़रायल ने पाकिस्तान दे रक्षा मंत्री खवाजा आसिफ दिएं टिप्पणिएं दी सख्त निंदेआ कीती ऐ। इज़रायल ने उन्दी टिप्पणिएं गी ऐतराज़-जोग करार दिंदे होई पच्छिम एशिया च जारी तनोतनी च इक निरपक्ख मध्यस्थ दे तौर पर पाकिस्तान दी विश्वसनीयता पर सोआल पुट्टेआ। एह प्रतिक्रिया आसिफ दी सोशल मीडिया पर कीती गेदी विवाद आली टिप्पणी दे बाद आई ऐ।

एहदे च आसिफ होरें इजरायल दी बड़ी मती निंदेआ कीती ते भइकाऊ ब्यान दिते जिंदी बड्डे स्तर पर नुक्ताचीनी कीती गई। इजरायल दे बदेश मंत्री होरें बी इनें ब्यानं दी निंदेया करदे होई उनें'गी साफ तौर पर यहूदिएं दे खलाफ दस्सेआ।

<><><><><><>

Trump -Iran Ceasefire

अमरीकी राष्ट्रपति डोनाल्ड ट्रम्प होरें ईरान संघर्ष कन्ने जुड़े दे मौजूदा संघर्ष विराम दे असरदार रौहने पर चिंता जाहिर कीती ऐ। उनें दोष लाया जे ईरान होर्मुज जल डमरु मध्य थवां तेल प्रवाह कन्ने सरबंध च सहमत शर्ते दा पालन नैई करी परा रदा ऐ। ट्रम्प होरें सोशल मीडिया पर इक पोस्ट च आखेआ जे ईरान तेल शिपमेट दी इजाजत देने च बड़ा गलत कम्म करा'रदा ऐ। उनें तेहरान आसेआ इस महत्वपूर्ण रस्ते थमां लंघने आहले टैंकरे पर शुल्क लाने दी खबरें खलाफ चेतावनी दिती।

<><><><><><>

Isreal Cabinet

इजरायल दे प्रधानमंत्री बेंयामिन नेतन्याहू होरें आखेआ ऐ जे उनें अपने मंत्रीमंडल गी लेबनान कन्ने फौरी तौर पर सीधी गल्लबात शुरु करने दा निर्देश दिता ऐ। नेतन्याहू होरें आखेआ जे लेबनान च कोई युद्ध विरास नैई ऐ। इक वीडियो सनेह च उनें आखेआ जे उत्तरी इजरायल च सुरक्षा ब्हाल होने तगर इजरायल हिजबुल्लाह पर हमले जारी रक्खोग। एदे थमां पैहले इजरायली सेना नै बेरुत दे किश हिस्सें आस्तै आदेश जारी कीते हे। इस दौरान लेबनान दे सेहत मंत्रालय दा आखना ऐ जे इजरायली हमले च मरने आहलें दी गिनतरी 303 होई गई ऐ।

<><><><><><>

Putin Ceasefire

रुस दे राष्ट्रपति ब्लादिमीर पुतिन होरें ऑर्थोडॉक्स ईस्टर सप्ताह दे खीरे दौरान यूक्रेन च 32 घंटे दे संघर्ष विराम दी घोषणा कीती ऐ। एदे थमां पैहले यूक्रेन दे राष्ट्रपति ब्लादीमीर ज़लेस्की होरें छुट्टी मनाने आस्तै संघर्ष गी रोकने दा प्रस्ताव रखेआ हा। क्रेमलिन आसेआ जारी पुतिन हुंदे आदेश च रुसी सेनाएं गी शनिवार थमां ऐतवार तगर संघर्ष विराम दा पालन करने दा निर्देश दिता गेआ ऐ।

<><><><><><>

IPL

IPL क्रिकेट च लखनऊ सुपर ज्याइंटस ने कल रातीं कोलकाता दे इडन गार्डन च होए दे रोमांचक मुकाबले च कोलकाता नाइट राइडर्स गी 3 विकेटें कन्नै हराई दिता। कोलकाता नाइट राइडर्स आसेआ दिते गेदे 182 रन्जें दे लक्ष्य दा पिच्छा करदे होई लखनऊ नै 3 विकेटां बाकी रौहन्दे अखीरली गेंद च जित हासल करी लैती। मुकुल चौधरी ने 27 गेंदें च 54 ते आयुष बदोनी ने 34 गेंदें च 34 रन्ज बनाए ते लखनऊ दी जित च अहम भूमिका निभाई। मुकुल चौधरी गी मैन ऑफ द मैच चुनेया गेआ। तौंआई IPL च अज्ज गुवाहाटी दे ACA स्टेडियम च रॉयल चैलेन्जर्स बेंगलूरु दा मुकाबला राजस्थान रॉयल्स कन्नै होग। मैच संजा साइडे 7 बजे शा खेड्ढेया जाहग।

<><><><><><>

Weather

मौसम विभाग नै अज्ज अहमदाबाद प्रदेश च बी मती बरखा होने दा अनुमान जाहिर कीता ऐ। विभाग नै एह बी आखेआ ऐ जे असम-मेघालय- ओडिशा-उप हिमालयी- पच्छिम बंगाल ते सिक्किम च दिनभर बिजली मिलकने ते तेज हवाए दे चलने दी संभावना जताई गई ऐ। मौसम विभाग नै अरुणाचल प्रदेश- केरल-माहे- नागालैंड- मणिपुर- मिजोरम ते त्रिपुरा च बिजली मिलने दी भविष्यवानी कीती ऐ। रायलसीमा दक्खन आंतरिक कर्नाटक-तमिनाडू-पुदुचेरी ते कराईकल च बी इय्यै नैही स्थिति रौहग।

<><><><><><>

Amarnath Yatra Registration

सलाना श्री अमरनाथ जी दी यात्रा लेई एडवांस रजिस्ट्रेशन 15 अप्रैल थमां मुल्ख भरे च 554 नामज़द बैंक शाखें च शुरु होग। श्री अमरनाथ श्राईन बोर्ड ने इक ब्योरेवार चरण-दर-चरण प्रक्रिया जारी कीती ऐ जेहदे च हर रोज दे कोटे दे अधीन पैहले आओ- पैहले पाओ दे आधार पर परमिट जारी कीते जागंन। 13 शा 70 बरे दी बरेसू दे तीर्थयात्री यात्रा दे पात्र न, जिसले के 6एं हफते शा मती अवधि आहली गर्भवती महिलाएं गी यात्रा करने पर रोक होग।

<><><><><><>